

Rapport dalla sessiun dil cussegl da vischnaunca dils 18-06-2018

Tractanda 1

Approbaziun dil protocol dalla sessiun dils 30-04-2018

Il protocol dalla sessiun dils 30 d'avrel 2018 vegn approbaus en votaziun unanima cun engraziament.

Tractanda 2

Informaziun davart il project per la revitalisaziun dil Rein

Jakob Grünenfelder dil biro ecowert presenta il project per la revitalisaziun dil Rein. Ils biros involvai vesan grond potenzial da renaturalisar il Rein ella Surselva. Avon 50 tochen 70 onns era ei usit da canalisar ils reins. Oz pagan la confederaziun ed ils cantuns la gronda part da dismetter ils uors e renaturalisar tals. L'incarica per luvrar ora in εμπrem preproject ei denton vegnida da "Naturemade Star – Fonds" e "KW Castasegna ewz". Quels possedan in fondo cun daners ord la vendita d'energia ecologica ch'els ston impunder per projects en favur dalla natira. Ord quels fondos vegness pagau ca. 20 pertschien dalla renaturalisaziun dil Rein sin territori da nosa vischnaunca. Tier projects semegliants gia realisai semussa in grond avantatg per flora, fauna ed animals manedels.

Il cussegl da vischnaunca fa diever dalla pusseivladad da tschentiar damondas. La suprastanza communal vegn ad incaricar ils responsabels da luvrar ora vinavon il project. La finamira ei, da luvrar ora il project en concordanza cun tut ils pertuccai e silsuenter suttametter quel al pievel.

Tractanda 3

Eleczion d'in ulteriur commember en la cumissiun per la revisiun dalla planisaziun locala

Actualmein fan Dumeni Tomaschett, Donat Nay e Toni Pfister part alla cumissiun per la revisiun dalla planisaziun locala. Igl ei fetg impurtont ch'il gerau da baghegiar ei involvaus en la planisaziun locala. La suprastanza communal propona perquei d'eleger supplementarmein Kurt Wolf en la cumissiun per la revisiun dalla planisaziun locala.

Cun 13 : 0 vuschs elegia il cussegl da vischnaunca il gerau da baghegiar Kurt Wolf en la cumissiun per la revisiun dalla planisaziun locala.

Tractanda 4

Damonda da credit per l'emprema fasa dalla revisiun dalla planisaziun locala

Igl onn 2014 ha il pievel approbau cun gronda maioritad la nova lescha federala davart la planisaziun dil territori. Sin fundament da quella nova lescha ha il cantun allura elaborau in plan directiv. Il plan directiv cuntegn ina retscha incaricas per las vischnauncas. Aschia sto per exempel vegnir elaborau enteifer dus onns in maletg empalont dalla planisaziun locala ed enteifer tschun onns sto l'entira revisiun dalla planisaziun locala en las vischnauncas esser serrada giu.

Entrar en tractanda vegn decidiu unanimes

La planisadra da nossa vischnaunca, Esther Casanova, informescha detagliadamein davart il plan directiv e las consequenzas per la vischnaunca da Trun. Vinavon declara ella las incaricas che la vischnaunca ha enteifer la revisiun totala dalla planisaziun locala. Il cussegl da vischnaunca fa diever da tschentar damondas e menar discussiun.

Per realisar l'emprema fasa dalla revisiun totala, il maletg empalont dalla planisaziun locala, basegna la suprastanza communal in credit net da frs. 65'000.-.

Cun 13 : 0 vuschs conceda il cussegl da vischnaunca in credit da frs. 65'000.- net per l'emprema fasa dalla revisiun dalla planisaziun locala.

Tractanda 5 Eleczion d'in delegau per la lavur da giuventetgna

Al cussegl da vischnaunca reussescha buca d'anflar in delegau per la lavur da giuventetgna ord las atgnas retschas. Ins vul ir ordeifer il gremi sin la tscherca d'ina persuna interessada e qualificada.

Tractanda 6 Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Beat Pfister

L'actuara
Sandra Gautschi